



Las Squadras

1

Informaziuns generalas e messadi tier la radunonza communal dils 17 da zercladur 2014

Messadi per la radunonza communal dils 17-06-2014

Messadi per la radunonza communal dils 17-06-2014 allas 20.00 uras en casa da scola a Surrein

La suprastonza communal suttametta las suandontas fatschentas:

1. Avertura e beinvegni
2. Elecziun da 2 dumbravuschs
3. Approbaziun dil protocol dalla davosa radunonza communal dils 25-03-2014
4. Rendaquen 2013
5. Rapport dils revisurs ed approbaziun dil quen annual 2013
6. Tractaziun ed approbaziun dil project per parcadis novs a Clavadi e concessiun d'in credit brut da 130'000 francs persuenter
7. Decisiun davart la cumpra dalla parcella 2709 a Clavadi e concessiun d'in credit da 72'000 francs persuenter
8. Orientaziuns
9. Varia

Tractanda 3: Protocol

Dil protocol dalla radunonza communal dils 25-03-2014 sa vegnir priu investa sin canzlia communal durant las uras da spurtegl. Avon radunonza ei il protocol ultra da quei exponius per investa. Il protocol sa era vegnir abonnaus per la summa da frs. 25.00 per onn tier l'administraziun communal.

Tractanda 4: Rendaquen 2013

Il rapport da gestiun e quen 2013 che ei vegnius repartius a mintga casada e dat sclariment en detagl sur dil quen communal 2013. Plinavon cuntegn el las ulteriuras informaziuns usitadas.

Ord quei motiv vegn quella tractanda buca presentada specialmein en LAS SQUADRAS.

A caschun dalla radunonza communal vegnan il canzlist ed il president communal plinavon a dar sclariment detagliu sur dil quen communal 2013.

Tractanda 5: Rapport dils revisurs ed approbaziun dil quen annual 2013

La cumissiun da quen e gestiun sut il presidi da *Ciril Cathomas* ha controllau ed examinau il quen communal. Sin fundament d'art. 49 dalla constituziun communal succeda la controlla aritmetica dil quen communal entras in biro fiduziar. Quell'incumbensa ei vegnida exequida dil biro fiduziar Cathomas + Cabernard SA da Glion. *Marcus Holderegger e Giuliana Gienal* dil biro Cathomas + Cabernard SA han fatg la revisiun dil quen e dalla contabilitad en collaboraziun culla cumissiun da quen e gestiun. Ils rapports detagliai dalla cumissiun da quen e gestiun sco era quel dil biro fiduziar ein d'anflar el rapport da gestiun e quen 2013.

Proposta

Sin fundament dil resultat dalla revisiun propona la cumissiun da quen e gestiun alla radunonza communal:

- d'approbar il quen communal 2013 sco presentau a scret,
- da dar scarica alla suprastonza, als ulteriurs organs responsabels ed all'administraziun e d'admetter in cordial engraziament per lur engaschi en favur da nosa vischnaunca.

Tractanda 6: Tractaziun ed approbaziun dil project per parcadis novs a Clavadi e concessiun d'in credit brut da 130'000 francs persuenter

Gia dapi biars onns s'occupescha la suprastonza communal cun la damonda da realisar parcadis a Clavadi. Quels ein buca primarmein pils vischins da Clavadi sez, mobein per persunas d'ordeifer che van a Clavadi cun auto. Sco a tuts enonuschent dat ei egl uclaun dalla caplutta da Nossadunna negin parcadi public, sulettamein ina piazza da sevolver. Ils biars pelegrins che visetan la caplutta ein aschia sfurzai da parcar ils autos sin parcelas privatas e sin terren agricol.

Examinau pliras variantas

Tier la damonda per parcadis novs ei semussau, ch'igl ei pulit grev d'anflar in liug adattau che ademplescha las premissas per ina buna piazza da parcar. Quei vegn lu era ad esser stau il motiv che quella damonda ei adina puspei vegnida spustada. En plirs lohens eis ei vegniu examinau la realisaziun da parcadis. Ord differents motivs ein ils biars projects semussai per buca realisabels.

La parcella 2709


La finfinala ei la parcella 2709 semussada per la pli adattada per la realisaziun dil project giavischau. Il liug ei centrals e la situaziun topografica ei fetg ideala per far leu ina piazza cun parcadis. Ei setracta dalla parcella nua che la resgia veglia dallas familias da Benedetg Flury artavels sesanfla.



Il menaschi da quella resgia ei dapi biars onn buca pli en funcziun ed il baghetg per part en schliet stan. La parcella sesanfla en zona da baghegiar dil vitg ed ei aschia conforma per in tal project da baghegiar. Ils artavels dalla famiglia Flury ein sedecidi da vender quella parcella, per saver realisar quei desiderau project als vischins da Clavadi. Il baghetg dalla resgia cun tut ils indrez vegn dismiss sin donn e cuost dils possessurs da quel.

Il project

Il project preveda ina piazza cun diesch parcadis. La piazza ei ca. 27.70 meters liunga e ca. 8.50 meters lada. Igl access ei directamein dalla via existenta.



Informaziuns cuortas

Emprendist forestal

L'entschatta fenadur 2014 entscheiva Severin Schaniel da Sumvitg igl emprendissadi da bostger tier la gruppa forestala. Igl emprendissadi cuoza 3 onns. Duront quei temps frequenta il Severin la scola professiunala a Glion ed a Cuera sco era differents cuors. Cun exequir differents lavurs sil sector forestal sa el rimnar experientschas, profundar la savida e seprofitar dall'experientscha dils ulteriurs luvriers forestals. Aschia sa el sepreparar optimalmein pils examens finals e per la veta professiunala. Nus giavischein al Severin bia plascher e satisfacziun en siu emprendissadi.



Agl ur encunter miezdi dils parcadis vegn construiu ina pintga suoschna. En quella vegn ina part dalla resgia veglia deponida sco relict historic che duei era egl avegnir regurdar alla liunga tradiziun da resgiar lenna a Clavadi. Ils cuosts da restaurar la resgia e deponer ella el liug previu sorprendan ils vischins da Clavadi.

Cuosts e finanziaziun

Da tut las variantas examinadas ei la varianta presentada la pli favoreivla. Ils cuosts per la realisaziun da quei project ein calculai cun total 130'000 francs. Biabein la mesadad da quels cuosts vegn finanziada cun daners dil conto contribuziuns privatas per parcadis. L'autra mesadad dils cuosts vegn finanziada cun daners generals.

Proposta

La suprastanza communal propona d'approbar il project e da conceder in credit da 130'000 francs per la realisaziun da novs parcadis a Clavadi.

Tractanda 7: Decisiun davart la cumpra dalla parcella 2709 a Clavadi e concessiun d'in credit da 72'000 francs persuerter

La parcella nr. 2709 appartegn actualmein alla cuminonza d'artavels da Benedetg Flury da Rabiuis. Quella ei prompta da vender la parcella alla vischnaunca per la summa da 70'000 francs, per gl'intent da realisar parcadis.

La cumpra dalla parcella nr. 2709 cun ina surfatscha da 597 m² sa vegnir finanziada ord il fondo recav terren communal che cuntegn actualmein rodund la summa da 284'000 francs. Ensemen culs cuosts accessoris cuosta la parcella nr. 2709 biabein 72'000 francs.

Sin fundament digl art. 2 al. 2 b) dalla lescha davart beins e dretgs immobiliars decida la radunonza communal sur da quella cumpra.

Proposta

Ord sura motivs propona la suprastanza alla radunonza communal da cumprar la parcella nr. 2709 a Clavadi e da conceder il credit da 72'000 francs persuerter.

Autista bus da scola

Culla fin digl onn da scola terminescha dunna Ida Deflorin-Tuor da Sumvitg siu pensum sco autista dil bus da scola. Nus engraziain ad ella da cor per siu zun preziau e fidau engaschi pil transport da nossas scolaras e nos scolar e giavischein ad ella pigl avegnir tut bi e bien.

Editura

Vischnaunca Sumvitg, Quadras su 5, 7175 Sumvitg
telefon: 081 920 25 00, fax: 081 920 25 08,
e-mail: info@sumvitg.ch